

交誼典第二十六卷

鄉里部彙考一

禮記 曲禮

年長以倍則父事之十年以長則兄事之五年以長則肩隨之羣居五人則長者必異席

注年長

以倍謂年二十於四十者人年二十弱冠成人有爲人父之端今四十於二十者有子道內則曰年二十悖行孝弟肩隨者與之並行差退席以四人爲節因宜有所尊

疏

此謂鄉里之中非親非

友但年長倍已則以父道事之卽父黨隨行也人年三十而娶子後乃有子則三十於六十乃是

倍年今鄭言二十於四十者但加冠責以爲人父爲人子之禮雖未有妻子有爲人父之端以二

十未合有子有子道也年二十於三十者半倍故兄事之則止差退而鴈行也若二十於二十五

者肩隨之則齊於鴈行也羣居謂朋友居處法也古者地敷橫席而容四人四人則推長者居席

端若有五人會應一人別席因推長者異席若賓主禮席皆無同坐故鄉飲酒賓介異席又云衆

之賓席皆不屬焉鄉射衆賓之席繼而西謂相連屬也燕禮及大射公三重大夫再重是皆異席

也集說廬陵胡氏曰此謂鄉里之中父兄之黨也

入里必式

注

入里必式不誣十室也

疏

二十五家爲里里巷首有門入里則必式而禮之

集說馬氏

曰詩曰維桑與梓必恭敬止此入里必式之意也石慶入里門不下車而其父責之張湛望里門則步君子多之則入里必式者父母國之道也

周禮 天官

小宰之職以官府之八成經邦治三曰聽閭里以版圖

疏

在六鄉則二十五家爲閭在六遂則二

十五家爲里閭里之中有爭訟則以戶籍之版土地之圖聽決之

地官

大司徒施教法於邦國都鄙使之各以教其所治民令五家爲比使之相保五比爲閭使之相受四閭爲族使之相葬五族爲黨使之相救五黨爲州使之相賙五州爲鄉使之相賓

注

此所以勸民

者也使之者皆謂立其長而教令使之保猶任也救救凶灾也賓賓客其賢者受者宅舍有故相受寄託也賙賙者禮物不備相給足也閭二十五家族百家黨五百家州二千五百家鄉萬二千五

百家

疏

立長謂若比長閭胥至鄉大夫等

訂義

項氏曰人之生有天屬有人屬天屬則不待教而相

親至於人屬無事則相往來有事則相棄背非上之人有以教之不可是故先王爲比爲閭則必有以令之相保相受則必有以使之令之則不容於或遣使之則不容於或背 陳君舉曰百家之中不幸有死者相與辦其葬事不使五家與二十五家供之者以百家然後衆輕易舉也大利害大患難非百家所可禦必五百家然後足以相救水旱凶荒欲以相賙又非五百家所能辦惟二千五百家則其地必闊必無皆水皆旱之理庶幾有無可以相通 王昭禹曰鄉遂之制始於五家之寡而衆於萬有二千五百家之衆居雖異室而從容若一家體雖異腹而和合若一心司徒以安之則相爲愷悌焉司馬以用之則相爲憂患焉

小司徒凡民訟以地比正之

疏

六鄉之民有爭訟之事是非難辨故以地之比鄰知其是非者共

正斷之

鄉師之職各掌其所治鄉之教而聽其治以國比之法以時稽其夫家衆寡辨其老幼貴賤廢疾馬牛之物辨其可任者與其施舍者掌其戒令糾禁聽其獄訟

訂義

鄭謂曰小司徒有九比之法以稽

夫家之數謂之比法鄉師用法則謂之國比之法言其法乃國之法而非鄉師之所制也 項氏曰小司徒先貴賤鄉師先老幼蓋朝廷莫如爵鄉黨莫如齒可任爲軍所謂可任者家三人之類戒之使謹令之使行糾之使不肆禁之使勿爲

大役則帥民徒而至治其政令既役則受州里之役要以攷司空之辟以逆其役事

訂王昭禹曰義

大役任衆力役之大者若城郭溝渠之役州里州所里也五黨爲州民所居曰里而所役之民出於州里役要役數之要書欲知役數之多寡 項氏曰司空掌役州里出役卽州里所遣役之本數以攷司空治役之章程則役事可得而鉤考矣

凡邦事令作秩敘

訂王昭禹曰

凡有所興治皆謂之事言邦事則非鄉里之自興治者也秩則制

其常賜之多寡叙則差其事治之先後作秩敘者鄉吏也鄉師令之而已

大祭祀羞牛牲共茅蒔大軍旅會同正治其徒役與其輦輦戮其犯命者大喪用役則帥其民而至遂治之及葬執纛以與匠師御匱而治役及窆執斧以涖匠師凡四時之田前期出田法於州里簡其鼓鐸旗物兵器修其卒伍及期以司徒之大旗致衆庶而陳之以旗物辨鄉邑而治其政令刑禁

巡其前後之屯而戮其犯命者斷其爭禽之訟凡四時之徵令有常者以木鐸徇於市朝以歲時巡國及野而賙萬民之難阨以王命施惠歲終則攷六鄉之治以詔廢置正歲稽其鄉器比共吉凶二服閭共祭器族共喪器黨共射器州共賓器鄉共吉凶禮樂之器

訂鄧鏐曰先王之世宮室車輿義

以爲居衣裳冕弁以爲服尊爵俎豆以爲器金石絲竹以爲樂非特用之朝廷又用之閭里民日從事於其間耳聞而目見之所以知禮樂之意而成粹美之俗竊疑閭里之間何從有是器而用之及攷鄉師然後知六鄉之民俱合衆財以爲之人衆則財用足財用足則器用備故觀其所聚之衆寡各因其財力使制其器比五家耳財適足以制吉凶弔祭之二服故比集財爲之而一比共用焉器則未能備也閭二十五家財適足以制簠簋鼎俎之器故閭集財以爲之而一閭共用焉族之百家財適足以制夷槃輶軸之器故族集財以爲之而一族共用焉至於射器則定其位有物課其功有算詔之有旌節之有鼓有弓有矢有侯有布用財多故合五百家之財而爲之賓器則六十者三豆七十者四豆八十者五豆九十者六豆有爵有鬯有笙有瑟其用尤多故合二千五百家之財而爲之然後共用也吉凶禮樂之器卽閭里黨州所共者是已 王昭禹曰吉

器非必祭器凡飲食冠昏之屬皆是凶器非必喪器凡干戈戚揚之屬皆是禮樂之器非必賓射之器凡有其具於禮樂者皆是吉凶禮樂之器衆矣故集一鄉之財爲之然後足以供也

若國大比則攷教察辭稽器展事以詔誅賞

訂義

王昭禹曰六鄉之吏各主教其所屬之民或書其

敬敏任恤或書其孝悌睦姻有學者或書其德行道藝或攷其德行道藝而勸之若此之屬無非教矣然教之不明也常起於辭之不正辭苟不正則言僞而辨順非而澤飾智以驚愚訛言以惑衆將至於不可禦矣

鄉老二鄉則公一人鄉大夫每鄉卿一人

訂義

王氏曰鄉老公也尊之於鄉憲其言行不累以事故

稱老鄉老於司徒之官非屬而無職

黃氏曰鄉大夫猶有職掌鄉老惟大比興賢能獻書於王

則與焉所謂師也父兄也

陳君舉曰鄉大夫卿也謂之大夫卿知進止之義大夫以智帥人者

也進止所以事人帥人所以臨下列職於朝名之曰卿正其位也分治六鄉名之曰大夫非卑之

也蓋掌鄉之政教禁令非以智帥人不可鄉大夫之職所以異於地官者以此

鄉大夫之職各掌其鄉之政教禁令

注

鄭司農曰萬二千五百家爲鄉

正月之吉受教法於司徒退而頒之於其鄉吏使各以教其所治以致其德行察其道藝以歲時登其夫家之衆寡辨其可任者國中自七尺以及六十野自六尺以及六十有五皆征之

訂王昭禹義

曰族師職卑所統者寡故使之校其數然後登上其籍鄉大夫職尊所統者衆故登其籍不校其數小司徒頒比法於六鄉之大夫使各登其鄉之衆寡則使登其籍於大司徒也辨其可任者辨其力強而可任以事者也黃氏曰征不言歲而言七尺六尺者歲雖登而身不及則爲疾所謂瘠短侏儒者也則舍之國中晚征而早舍爲其近而役多野則早征而晚舍以其遠而役少

其舍者國中貴者賢者能者服公事者老者疾者皆舍

注

鄭司農云舍者謂有復除舍不收役事

也

以歲時入其書三年則大比攷其德行道藝而興賢者能者鄉老及鄉大夫帥其吏與其衆寡以禮禮賓之厥明鄉老及鄉大夫羣吏獻賢能之書於王王再拜受之登於天府內史貳之退而以鄉射之禮五物詢衆庶一曰和二曰容三曰主皮四曰和容五曰興舞

訂

黃氏曰和內志正也容外體

直也主皮中也復曰和容中不驕不中不懼也興舞其節比於樂也

此謂使民興賢出使長之使民興能入使治之歲終則令六鄉之吏皆會政致事正歲令羣吏攷法於司徒以退各憲之於其所治之國大詢於衆庶則各帥其鄉之衆寡而致於朝國有大故則令民各守其閭以待政令

疏

大故謂災變寇戎之事警急須人故鄉大夫令州長已下使民各守其閭

以旌節輔令則達之

訂義

黃氏曰徵發雖有號令無節不達守法之嚴如此鄉大夫專行攷察行藝

以興賢能而令民守閭之事參焉鄉大夫皆卿也是爲軍將

州長每州中大夫一人各掌其州之教治政令之法正月之吉各屬其州之民而讀法以考其德行道藝而勸之以糾其過惡而戒之若以歲時祭祀州社則屬其民而讀法亦如之春秋以禮會民而射於州序凡州之大祭祀大喪皆蒞其事若國作民而師田行役之事則帥而致之掌其戒令與其賞罰歲終則會其州之政令正歲則讀教法如初三年大比則大攷州里以贊鄉大夫廢興

注廢

興所廢退所興進也

訂義

史氏曰不曰誅賞而曰廢興者鄉大夫之教民興賢能廢愚不肖而已至

於誅賞則大司徒王之事也

黨正每黨下大夫一人各掌其黨之政令教治及四時之孟月吉日則屬民而讀邦法以糾戒之春

秋祭禋亦如之國索鬼神而祭祀則以禮屬民而飲酒於序以正齒位壹命齒於鄉里再命齒於父族三命而不齒

訂義

陳君舉曰一命者天子之下士公侯伯之上士子男之大夫而與鄉里齒焉再

命者天子之中士公侯伯之大夫子男之卿而又與族齒焉三命者天子之上士公侯伯之卿雖云不齒亦異席而已非敢居其上

凡其黨之祭祀喪紀昏冠飲酒教其禮事掌其戒禁凡作民而師田行役則以其法治其政事歲終則會其黨政帥其吏而致事正歲屬民讀法而書其德行道藝

訂義

鄭鐸曰戒謂黨正四時孟月之

吉與夫春秋之禋有糾戒之讀法歲十二月又有正齒位之飲酒於是時也不書其民德行道藝至於正歲讀法則一書之何也蓋讀法而糾戒之特以勉勵其修爲之始大蜡而正齒位特以變革其田野之習正歲始一書者見德行道藝之難能使人終歲修之以俟一朝之見錄非正歲則黨正不書非修習之已成則正歲不書聚民讀法以書之重難其事如此彼見書之人豈一朝而幸得之哉王昭禹曰黨正之所書固非一日之積州長所以攷而勸之者亦因黨正之所書而已鄉大夫所以攷而興之者又因州長之所攷而已

以歲時涖校比

注

鄭司農云校比族師職所謂以時屬民而校登其族之夫家之衆寡辨其貴賤

老幼廢疾可任者及其六畜車輦如今小案比

及大比亦如之

疏

族師至三年大案比黨正亦涖之

族師每族上士一人各掌其族之戒令政事月吉則屬民而讀邦法書其孝弟睦姻有學者春秋祭
醕亦如之以邦比之法帥四閭之吏以時屬民而校登其族之夫家衆寡辨其貴賤老幼廢疾可任
者及其六畜車輦五家爲比十家爲聯五人爲伍十人爲聯四閭爲族八閭爲聯使之相保相受刑
罰慶賞相及相共以受邦職以役國事以相葬埋

訂義

黃氏曰比閭黨州皆以五而登惟閭四族變

其中者所以爲聯法也故五家爲比有聯則閭合四閭爲族有聯則黨合如是則比閭族黨無不
合者居則五家爲比十家爲聯行則五人爲伍十人爲聯五伍也十什也故士師曰掌鄉合州黨
族閭比之聯與其人民之什伍是也鄉合非野法也四閭爲族八閭爲聯八閭二百家軍法雖四
而調一要必以是而起鄭康成注稍人曰以人數調之使勞逸遞焉是也大司馬有車有徒故十
人爲聯則伍合二伍二百人爲聯則卒合二卒以二百人計之七十五人共車三伍百二十五人

爲徒兵五伍皆伍也合則皆什也晉荀吳毀車爲行而曰以伍共車爲先又曰困諸阨又克蓋當險野利用徒盡合車人而用之故謂之以什共車此本先王微意荀吳窺見之耳然必素聯合故倉卒可用

若作民而師田行役則合其卒伍簡其兵器以鼓鐸旗物帥而至掌其治令戒禁刑罰歲終則會政致事閭胥每閭中士一人各掌其閭之徵令以歲時各數其閭之衆寡辨其施舍凡春秋之祭祀役政喪紀之數聚衆庶旣比則讀法書其敬敏任恤者凡事掌其比觥撻罰之事

訂義

鄭鐸曰六行之

教曰孝友睦婣任恤而已初未嘗教以敬敏也今乃書其敬敏任恤者蓋世有好名之人以任恤爲能者臨事或慢侮而待人不敬赴事或遲緩而應機不速必視其能敬敏於任恤之事然後書之皆不足以爲高行此與族師書其睦婣有學者意同王昭禹曰二十五家其數寡而可以數計之敬敏任恤其事易見其行易知閭胥之賢不足於族師故書其敬敏任恤而已任恤與孝友睦婣同爲六行任恤爲末孝友睦婣爲本故族師書其孝友睦婣閭胥書其任恤而已

比長五家下士一人各掌其比之治五家相受相和親有皐奇衰則相及徙於國中及郊則從而授

之

訂義

王昭禹曰死徙無出鄉者其常也此言徙於國中及郊於他者其變也

若徙於他則爲之旌節而行之若無授無節則唯圖土內之

訂義

劉迎曰居鄉無授出鄉無節此無

根著之人故以圖土內之

呂氏曰先王之民無一人無係屬者徙於彼又授之於他徙於他則

爲旌節無授無節則是無係屬之民而囚之圖土矣閒民無常職但不服職而已有身則有家有家則係於此可知如是則雖有游手機巧之民亦將日漸月化而不自知使成周之君長守法則雖奸雄豪傑且俯首而不敢倡惟其失此法遂至於民無附著而游手機巧徧天下矣

遂人中大夫二人

注

六遂之地自遠郊以達於畿中有公邑家邑小都大都焉遂謂王國百里外

訂義

王氏詳說曰六遂之官與六鄉之官一同六遂之法與六鄉之法一同但六遂之官卑於六鄉

一等六遂之法與六鄉相爲異同耳且以鄉遂之官言之六鄉有大司徒在六遂則爲遂人六鄉

有小司徒在六遂則爲遂師六鄉有鄉大夫在六遂則爲遂大夫六鄉有州長在六遂則爲縣正

鄙師卽黨正也鄴長卽族師也里宰卽閭胥也鄰長卽比長也然大司徒六命之卿而遂人不過

中大夫小司徒中大夫而遂師不過下大夫此六遂之間長貳也鄉大夫六命之卿而遂大夫不

過中大夫州長中大夫而縣正不過下大夫等而下之皆卑一命故六鄉之下士一命而六遂之下士不命此鄉遂之官異也且以鄉遂之法言之六鄉上地無萊畝而六遂上地則有萊五十畝矣六鄉以一人爲正卒其餘爲羨卒六遂則以一人爲正卒一人爲羨卒其餘爲餘夫矣六鄉所言伍兩卒旅師軍詳於軍制六遂所言遂溝洫澮川詳於田制然軍旅未始無田田制亦未始無軍要之互文見義也他如遂大夫所謂三歲大比則帥其吏而興眡卽鄉大夫所謂賓興賢能之法鄙師所謂祭祀若黨正所謂祭礬鄮長所謂祭祀卽族師所謂祭酺里宰所謂召斂卽閭胥所謂召令鄰長所謂徙於他邑後而授之卽比長所謂徙於國中及郊從而授之也然五物之詢德行道藝之攷見於鄉而不見於遂豈六遂無此等人耶

按六遂不言五物之詢德行道藝之攷者非六遂無此等人也蓋亦如六鄉詳軍制

六遂詳田制互文見義不復再舉耳

掌邦之野

注

郊外曰野此野謂甸稍縣都

訂義

黃氏曰遂人因六遂而爲名六遂在甸則所掌者甸

地而已而曰掌邦之野蓋合稍縣都鄙法之當行者通掌之稍縣都鄙居民廛里授田溝洫治地皆野法與甸同其法悉自遂人出稍爲邑縣鄙爲都則各聽于其主非遂人之所屬也遂人中大

夫秩比小司徒縣二千五百家鄙五百家隨民衆寡而爲之甸稍縣鄙居民皆如此惟甸則合縣爲遂

以土地之圖經田野造縣鄙形體之法五家爲鄰五鄰爲里四里爲鄣五鄣爲鄙五鄙爲縣五縣爲

遂

訂義

王昭禹曰土地之圖大司徒所建之國以土地之圖經田野則以所建之國爲井牧溝涂田

萊之類而經之也 易氏曰小不曰鄰言鄙之成則鄰之成可知大不曰遂言縣之成則遂之成

在其中言縣鄙則舉中以見上下 項氏曰比則親之至鄰則始相鄰近閭則同門里則同居族

則族葬鄣則相贊助而已鄙之名卑於黨縣之名小於州凡遂之制皆放於鄉 王氏曰比相保

則鄰亦相保閭相受則里亦相受族相葬則鄣亦相葬黨相救則鄙亦相救州相矜則縣亦相矜

鄉相賓則遂亦相賓矣 王東巖曰遂之鄰里鄣鄙縣遂與鄉之比閭族黨州鄉之法無異然司

徒於鄉不說經田野者以國中民廛接比行保伍之法易故不必經與造民野處四散保伍之法

難行復用經田野造縣鄙成然後可定民居若小司徒經土地而井牧田野一句乃是制井田起

軍賦與制保伍以定民居不同井邑自四井以下則以四起數造縣鄙自五家以下則以五起數

井天下之田用丘甸法比天下之居用保伍法故曰地不里居田不井授終苟道也 曹氏曰鄉遂王政之本皆以室數制之不容增減自鄭氏參以里數欲求強合始指若干里爲鄉若干里爲遂既室數與里數不合於是積算王畿千里之地去若干里爲山林川澤又去若干里爲不易一易再易之數然終有牴牾安有采地之制異於鄉遂之說旁加廣狹之說周家簡易之制未免汨沒有異同之論

皆有地域溝樹之使各掌其政令刑禁

訂義

鄭鍔曰皆有地域以爲之辨溝之以水樹之以木有限

域之周圍有溝樹之阻固建官設吏以治之使各掌其所治之政令刑禁民可得而治矣

以歲時稽其人民而授之田野簡其兵器教之稼穡

疏

授之田野若下文一廛百畝簡其兵器若

族師旗鼓兵革

遂師下大夫四人上士八人中士十有六人旅下士三十有二人府四人史十有二人胥十有二人

徒百有二十人

疏

遂師所掌如鄉師亦二人共主三遂

訂義

劉執中曰遂大夫各居其遂以施政教

遂師則贊遂人居司徒之府以治六遂之政令猶鄉司贊小司徒居於內以治六鄉

遂大夫每遂中大夫一人

疏

遂大夫各主一遂如鄉大夫各主一鄉但其官皆卑於鄉官命數皆

減一等

縣正每縣下大夫一人

鄙師每鄙上士一人

鄼長每鄼中士一人

里宰每里下士一

人

鄰長五家則一人掌相糾相受

疏

鄰長不命之士爲之各領五家使五家有過各相糾察

宅舍有故又相容受也

訂義

曹氏曰相糾相受乃使五家之鄰長得以專之蓋比屋而居五家之勢

爲至近朝夕出處五家之情爲易知其間純實而朴厚與懷奸而飾詐者皆不逃於目睫之頃以之相糾可使有所警而不爲非以之相受可使有所勸而必爲善變化其氣質潛消其邪心所謂舉賢興眡皆由此乎基之

秋官

士師之職掌鄉合州黨族閭比之聯與其民人之什伍使之相安相受以比追胥之事以施刑罰慶

賞

注

鄉合鄉所合也

訂義

王昭禹曰六鄉之內比其居則有州黨族閭比其民則有什伍合州黨族

閭比者以比合比以閭合閭所以聯其居也合其人民之什伍者以伍合伍以什合什所以聯其